

ORGANIZAÇÃO POPULAR DA MULHER TIMORENSE (OPMT)

Vizaun Jerál kona-ba Organizasaun no Aprosimasaun kona-ba Jéneru

Organização da Popular da Mulher Timorese (ne'ebé baibain bolu mós naran OPMT) movimentu masas fetu Timor nian ne'ebé mosu uluk liu iha Timor-Leste. Nia harii hanesan movimentu fetu partidu Fretilin nian iha 28 Agostu 1975, tuir kedas funu sivil entre Fretilin no UDT. Feto klosan radikál sira, ne'ebé barak simu edukasaun iha tempu Portugal nian, mak harii OPMT inklui Rosa Bonaparte no Isabel Lobato, Prezidente Fretilin Nicolau Lobato nia kaben. Membru fundadór sira haree katak iha nesiedade atu harii organizasaun ida ne'ebé bele komplementa Fretilin nia funu hasoru efektu kolonializmu nian ho kombate hasoru sistema patriarkal. Iha loron rua nia laran, bainhira militar Indonesia sira tama tiha iha Timor-Leste, sira oho Bonaparte no Lobato no tan OPMT nia membru sira seluk.

OPMT nia misaun jerál mak atu liberta fetu Timor. Molok invazaun Indonesia nian, OPMT servisu atu hatán ba kondisaun emergjénsia ne'ebé mosu bainhira liu tiha funu sivil no atu fó apoiu ba politizasaun ba fetu sira kona-ba kolonializmu no sistema patriarkal. Sira identifika poligamia no *barlaki* ('feto folin'), hamutuk ho prátika kazamentu nian, hanesan problema sosiál balu ne'ebé prezisa muda. Programa seluk inklui alfabetizasaun, haree labarik no sosializasaun polítika iha fetu sira-nia leet kona-ba Fretilin nia ideolojia.

Liu tiha invazaun Indonesia nian, OPMT servisu hamutuk ho Fretilin no nia liman kro'at Falintil. Feto balu la'o hamutuk ho mane kombattente Falintil sira no kaer mós kilat; balu hala'o servisu importante tebetebes iha luta klandestina no rezisténsia armada atu garante asesu ba ai-han, tratamentu médiku no hala'o informasaun. OPMT nia membru barak mak terus tebetebes tanba sira-nia envolvimentu iha luta, inklui violasaun seksuál, violénsia no mate iha militar Indonesia nia liman laran.

OPMT hala'o nafatin nia program sira uluk iha área alfabetizasaun no saúde nian durante okupasaun Indonesia. Hanesan uluk, OPMT hili nafatin lia Portugés. Maske OPMT harii nia prezensa substansiál iha Timor-Leste tomak durante okupasaun Indonesia, fetu sira-nia asesu atu hetan pozisaun iha Fretilin nia laran sei limitadu.

Iha 1998, organizasaun no partidu Timoroan sira ne'ebé buka atu hetan independénsia tama hamutuk iha organizasaun ida ne'ebé membru antigu Fretilin nian no Falintil nia ulun boot, Xanana Gusmão, mak kaer. Organizasaun ne'e naran Conselho Nacional da Resistência Timorese (CNRT). Organizasaun fetu CNRT nian mak Organização da Mulher Timorese (OMT), mosu atu sai mós apartidáriu no inkluzivu. OPMT mós hatán atu tama iha OMT. Maibé ho dizolve CNRT nian molok eleisaun ba Assembleia Konstituinte iha 2001, OPMT reforma an hanesan parte Fretilin nian. Tuir mai, membru barak husik OMT hodi fila fali ba OPMT.

OPMT nia misaun agora ne'e hanesan nafatin mós ho nia pozisaun ida uluk - fetu nia emansipasaun iha aspetu hotu-hotu, ne'ebé sei hetan liu-liu husi edukasaun no organizasaun komunitária. OPMT rekoñese katak liu tiha independénsia, sistema patriarkal no dezigualdade jéneru ninian sei iha nafatin. Maibé nia haree katak ho fetu sira-nia representasaun iha política formal, inklui hamosu GAPI no governu Fretilin nia programa sira, hatudu katak iha progresu di'ak.

Oras ne'e OPMT iha situasaun ida ne'ebé la'ós uzuál tanba nia pertense ba partidu ida ne'ebé tuur iha governu entre 2002 no 2007 no rejista nia an hanesan ONG independente ida. Nia

buka atu integra nia programa ho governu nian, no OPMT nia Sekretáriu Jerál ida agora ne'e membru Fretilin nian iha parlamentu. Organizaun ne'e nia lideransa la hatudu vontade boot atu sai independente, partidária. Sira argumenta katak organizaun ne'e nia istória liga ba Fretilin no mós katak sira iha autonomia no liberdade atu hola desizaun.

Tuir OPMT nia lideransa, hanesan ONG ida ne'ebé halo parte iha partidu polítiku, sira iha vantajen no mós desvantajen. Desvantajen tamba doador sira laiha vontade atu tulun organizaun feto ne'ebé halo parte iha partidu polítiku. Vantajen inklui asesu ba governu.

OPMT harii nia estrutura husi nível nasionál to'o *aldeia* no *suku*. Iha nível nasionál, distrital no subdistrital, iha konsellu koordenador no sekretáriu ezekutivu ida. Iha nível nasionál, iha mós sekretariadu no komité finanseiru. Iha nível *aldeia* no *suku*, iha koordenador ida no visi-koordenador rua. Jerálmente, desizaun kona-ba programa sira mai husi nível nasionál, ne'ebé membru sira iha nível nasional ba to'o iha comunidade lokál hodi fó hatene ba sira ka husu ba membru OPMT sira atu ba to'o iha Dili atu partisipa iha eventu ka simu treinamentu ruma. OPMT hateten katak nia la hatene membru hira mak nia iha, maibé número ne'e bele aas tanba baibain membru feto Fretilin sira halo mós parte hanesan membru OPMT nian.

Susar atu hetan informasaun barak kona-ba OPMT nia programa sira agora ne'e. Alende fó apoiu ba kampaña eleitoral Fretilin nian, OPMT hala'o mós programa suku roupa no alfabetizasaun iha comunidade lokál. OPMT nia voluntáriu sira mak implementa program hodi hanorin feto vulnerável sira hanesan faluk no oan-kiak sira kona-ba suku roupa, hodi fó kbiit ba sira atu buka oinsa hetan osan. OPMT halo parseria ho órgaun sira governu ninian atu hala'o programa alfabetizasaun iha distritu sira iha Timor-Leste laran.

Kontaktu

Tel: (670) 731 4141 (Secretary General Lourdes Maria Alves Araujo)

Husi: Trembath, Anna no Damian Grenfell, Mapa ba Lala'ok Buka Igualdade Jéneru: Atividade Ajénsia La Governamentál no Internasionál nian iha Timor-Leste, Globalism Institute, RMIT University, Dili, July 2007, ISBN 978-0-646-47770-1, pp. 56-58.